

佛語法門經

元魏北天竺三藏法師菩提流支初譯



南無本師釋迦牟尼佛

說明

本繁體校正版《佛語法門經》電子書，根據《乾隆大藏經》大乘單譯經，第 0387 部，元魏北天竺三藏法師菩提流支初譯《佛語法門經》原龍藏雕板印刷影印本校正。句讀僅作參考。特此說明。

仁慧草堂

二〇一七年十月

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

佛語法門經

元魏北天竺三藏法師菩提流支初譯

如是我聞：一時，婆伽婆住毗耶離大林樓閣上，與大比丘衆八千人俱，八萬四千諸大菩薩，復有學、無學無量人衆，圍繞說法。

爾時，會中有一菩薩，名龍威德上王，從座而起，整服右肩，右膝著地，合掌向佛，白言：“世尊！如來先說佛語修多羅諸經，復有說非佛語。世尊！此有何義？云何受持？”

爾時，佛告龍威德上王菩薩言：“善男子，如汝所問，於諸經中而說佛語非佛語者。善男子，如是非語即是佛語。善男子，善思念之。我於今者善爲汝說。”

時，龍威德上王菩薩而白佛言：“善哉！世尊！願樂欲聞。”

佛言：“善男子，言非語者，即是佛語。善男子，言佛語者，是則名爲最重身業。我之所說，皆悉無有不離身業、口業、意業，彼亦無語，無能說者，亦無言者。

“善男子，諸有色語，皆非佛語。若龍威德上王，色非語，非佛語者；受、想、行、識非語，

亦非佛語。善男子，若無色語，無受、想、行、識語者，是名佛語。

“善男子，若有身、口、意業語者，不名佛語。善男子，若無身、口、意業語者，是名佛語。

“善男子，若有地、水、火、風、空界，如是等語，不名佛語。善男子，若有不說地、水、火、風、空界等者，是名佛語。

“善男子，若有貪、瞋、癡語，不名佛語。善男子，若無貪、瞋、癡語，是名佛語。

“善男子，若有漏語、及無漏語，不名佛語。善男子，若非有漏語、非無漏語，是名佛語。

“善男子，若有所希，如是語者，不名佛語。以彼佛語，不希求故。善男子，若無高下，如是語者，是名佛語。

“善男子，若有事語、非事語者，不名佛語。善男子，若有非事、非非事語，是名佛語。

“善男子，若於自性清淨法上言得證者，彼非佛語。善男子，若非自性、非他性語，是名佛語。

“善男子，若有實語、非實語者，不名佛語。善男子，若無實語、無不實語，是名佛語。

“善男子，若有此語是凡夫人之所說語，此

是聖人之所說語，不名佛語。善男子，若無凡語、無聖人語，是名佛語。

“善男子，若有內語及有外語、內外語者，不名佛語。善男子，若無內語及無外語、內外語者，是名佛語。

“善男子，若於諸法，有色所依；受、想、行、識所依語者，不名佛語。善男子，若於諸法，無色可依，亦無受、想、行、識可依，如是語者，是名佛語。

“善男子，若有處語，是魔王語，是魔民語，不名佛語。善男子，若無一切諸處語者，是名佛語。

“善男子，若有色覺分別而語，受、想、行、識覺分別而語，不名佛語。善男子，若無色覺分別而語，受、想、行、識覺分別而語，是名佛語。以此義故，魔及魔民不得其便。

“復次，善男子，言菩薩者，若色無我，亦不分別非是我所，如是受、想、行、識無我，亦不分別非我所者，名爲菩薩。”

時，龍威德上王菩薩而白佛言：“世尊！以何義故，而有言說？何者言說？”

佛言：“善男子，魔波卑掾。復次，善男子，

若菩薩，色不作念：‘我當如是。’受、想、行、識亦不作念：‘我當如是。’如是，菩薩於一切處，皆無有語。龍威德上王，諸善男子有上勝者，斷一切語，斷一切障，滅諸我慢，斷一切網，離諸二見，離一切想。以無語故，云何有言？亦無可語！是故，非語名爲佛語。

“善男子，以此義故，當如是知，此是佛語。

“善男子，若無身無身行，無口無口行，無意無意行，非行非非行，非謗非不謗，不生不起，無想無處，無住無沒，非寂非行，諦語不動復非不動而亦不住，自然不緣亦非不緣。善男子，此是佛語。以彼無有可能語故，是名佛語。

“善男子，菩薩能作如是學已，是則名爲學上上智光明佛語、清涼佛語。徧悅一切諸衆生身，開發一切諸衆生意，趣向佛智，受持法義；徧悅一切諸菩薩衆，覺諸睡者，善入法界。是善決定向於法輪，轉於法輪，擊大法鼓，降諸魔衆，降伏異怨，降伏一切諸外道衆。是能救護向惡道者，是能莊嚴諸佛世界，是一切佛之所稱歎，必坐道場。知是菩薩已坐道場，如是菩薩已得菩薩諸陀羅尼。”

說此佛語法門之時，聖龍威德上王菩薩，菩

提分法皆悉滿足，即時獲得無生法忍。二萬六千諸菩薩等，得陀羅尼及諸三昧。八千比丘，得無漏法。復有八萬四千衆生，皆發阿耨多羅三藐三菩提心。即以神力雨種種華，供養世尊。

如來說是法門之時，聖龍威德上王菩薩及諸大衆、天、人、阿脩羅、迦樓羅、緊那羅、摩睺羅伽等，一切大衆，聞佛所說，皆大歡喜，信受奉行。

《佛語法門經》卷終

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

三皈依

(一編)

自皈依佛, 當願眾生, 體解大道, 發無上心;
自皈依法, 當願眾生, 深入經藏, 智慧如海; 自
皈依僧, 當願眾生, 統理大眾, 一切無礙, 和南
聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國



此咒置經書中可滅誤跨之罪

南无护法韦驮尊天菩萨

